

Protocol dalla radunonza generala dils 11-03-2017, las 20:00, Sporthotel La Cruna

Tractandas:

1. Beinvegni
 2. Elecziun d'in dumbravuschs
 3. Protocol dalla davosa radunonza generala dils 12 da mars 2016
 4. Rapport annual dil president
 5. Rendaquen per igl onn 2016
 - a) presentaziun dil quen entras il cassier
 - b) rapport dils revisurs
 - c) approbaziun dil quen
 6. Preventiv 2017
 7. Incorporaziun vischinadis Surrein e Selva
 8. Informaziuns
 - a) curdada da grep Val Strem
 - b) ventschida project Rueras-Zarcuns
 - c) problematica d'arsen
 9. Varia
-

1. Beinvegni

Allas 20:00 arva il president la radunonza generala e beneventescha tuts presents. L'invitaziun era stada publicada ella Tuatschina dils 3 da mars 2017 e plinavon stada menziunada pliras gadas sut las occurrenz. Suandontas perstgisas ein vegnidas inoltradas: Beat Roeschlin (president communal), André Schmid (gerau e revisur da quen), Sep Aluis Monn (survigilader), Reto Schmid e Theo Berther. Sin damonda dil president dat ei ni amplificaziuns ni midadas tier la gliesta da tractandas. Ils presents san concluder sur da la radunonza.

2. Elecziun d'in dumbravuschs

Sco dumbravuschs vegn Tumaisch Valier proponius ed elegius.

3. Protocol dalla davosa radunonza generala dils 12 da mars 2016

Il protocol dalla davosa radunonza generala dils 12-03-2016 vegn approbaus unanimamein. Quel vegn buca prelegius damai ch'el ei staus publicaus ella Tuatschina sco era sin la pagina d'internet dall'Aua Cristalla.

4. Rapport annual dil president

Entschiet ha igl onn 2016 atgnamein stupent denton cun bia lavur da suprastonza sco era per nos survigiladers. Ei era previu da remplazzar la lingia da conduct Rueras – Vietta – Zarcuns. Denton ha la curdada da grep dils 14 da mars 2016 ella Val Strem purtau a nus qui-

taus e fastedis pli gronds. Aschia han ins igl emprer stuiu perseguitar quei eveniment nuns-pitgau. Il donn era enorms per nus sco era per l'energia alpina.

Investiziuns 2016:

La gronda investiziun e succedida cun remplazzar il conduct Rueras – Vietta – Zarcuns. Quei project havein tuttina saviu realisar denton cun in retard da miez onn. Muort la bun'aura d'atun e negins incaps han ils termins saviu vegnir tenei en. Inaga dapli ein las lavurs vegnidas accumpignadas dall'energia alpina cun in niev conduct electric e nova illuminaziun. Medemamein ha la vischnaunca saviu sanar lingias da canalisaziun ed auas piarsas. En collaboraziun cun la vischnaunca eis ei ussa pusseivel da reactivar la senda veglia dalla vietta tras Zarcuns encunter Rueras. Cheu lessel cunzun engraziar als vischins pertuccai ch'ei stai prompts da dar il dretg da passadi sil sulom privat. Medemamein era als proprietaris dals praus per traversar e schar scavar. Las lavurs da catram e sullada vegnan a continuar el decuors digl onn 2017. Tut las lavurs ein vegnidas exequidas per pleina cuntentientscha dall'Aua Cristalla e tenor il credit previu.

Manteniments:

Sco adina han nos survegladers Sep A. Monn ed Urs Berther procurau ch'il manteniment vegni buca negligius. Els han dau inaga dapli tutta breigia per in bien manteniment. A Salins havein giu ina ruttadira vid il conduct. En quei connex havein midau ora entgins schiabers privats. Per ina part ha la segirada surpriu il donn caschunau.

Lubientschas da colligiazion:

Era l'Aua Cristalla senta che la branscha da construcziun aulta pitescha. Aschia dat ei plitost mudestas entradas da colligiazion tier objects novs. 2016 havein incassau taxas da mo rond frs. 18'000. La taxa per la halla plurivalenta ei cheu buca intergrada.

Sedutas da suprastonza:

Buca meins che 6 sedutas da suprastonza ha ei duvrau per liquidar las fatschentas digl onn 2016. Denter auter duas sesidas da damondas per incorporaziun. Vinavon in tschuat sedutas da preparaziun da projects e sentupadas cun igl uffeci da baghegiar.

Producziun d'energia Val Milà:

Las fontaunas en nossa Val han purtau igl onn 2016, cumpregliu cun auters onns, aua en abundanza, denton era pituu sut il schetg. Per la producziun d'energia dallas tschaffadas Val Milà eis ei iu anavos intragliauter 9 pertschien enviers igl onn avon. L'entrada da frs. 70'000 ei tuttina in'impurtonta summa per nus.

Investiziuns 2017:

Egl onn vegnend eis ei buca previu d'investar en pli gronds projects. Denton vulein planisar e sepreparar per igl onn 2018. Quei fuss ina lingia nova da transport a Surrein cun colligiar el conduct existent. La lingia da Surrein ei in project che nus havein gia instradau igl onn 2015 en cumbinaziun da producir energia cun l'aua restonta dils reservuars. Vinavon vegn la problematica d'arsen a Tschamut e Selva a fatschentar nus.

5. Rendaquen per igl onn 2015

a) presentaziun dil quen entras il cassier

Il cassier sa presentar in quen ulivau. Cheu las cefras inpurtontas digl onn 2016 (2015):

Total activas/passivas: frs. 1'356'688.72 (1'327'274.45)

Entradas: frs. 597'095.95 (549'936.71)

Expensas: frs. 606'617.17 (630'486.64)
Surpli entradas: frs. 9'521.22 (80'549.93)
Metels liquids rodunud frs. 180'000

b) rapport dils revisurs

Tenor art. 25 dils status examineschan ils revisurs da quen mintg'onn igl entir menaschi finanziel dalla corporaziun, rapporteschan e fan proposiziuns als commembers sin radunonza. Simeon Cavegn prelegia il rapport dils revisurs.

c) approbaziun dil quen

Era uonn ei puspei tut en uorden. Il quen vegn approbaus unanimamein ed ei vegn dau scarica als funcziunaris.

Il quen annual vegn approbaus unanimamein.

Tumaisch Valier giavischa dad era publicar il quen annual silla pagina d'internet. Quei mintgamai avon la radunonza generala, ensemen cul protocol. Aschia san ins prender investa en quell'impurtonta corporaziun da nossa vischnaunca. Sin ulteriura damonda da Tumaisch Valier, sche la corporaziun ha saviu curclar ils cuosts cun agens metels, ha il cassier saviu rispunder cun in ferm gie.

6. Preventiv 2017

Il cassier presenta il preventiv en detagl. Previu ein entradas da frs. 495'400, expensas da frs. 480'900, pia in surpli d'entradas da frs. 14'500. Deducziuns extraordinarias da frs. 200'000. Ils cuosts da persunal ein vegni augmentai sin frs. 88'000. Quei damai che las duas corporaziuns Surrein e Selva han fatg la damonda per fusiunar cull'Aua Cristalla. Ina fusiun ei probabla ed aschia crescha il pensum da lavur da nos survigiladers.

Tier las taxas da colligiaziun sa ei aunc dar midadas. Dependa cheu sche nus survegnin las taxas da colligiaziun dil Hotel Oberalp, sche la societad ei habla da pagar.

Il preventiv vegn approbaus unanimamein.

7. Incorporaziun vischinadi Surrein e Selva

Sep Hendry, il president actual dalla corporaziun da Surrein, e dapi 38 onns en siu uffeci, pren il plaid. El raquenta sur dil curriu e passau. La historia dalla corporaziun ei fetg interessanta. Cheu entgins puncts ord siu plaid. Igl'emprem reservuar ei vegnius eregius igl onn 1947. Ils onns 1958 / 1960 ein tuttas fontaunas svanidas en connex cun la formaziun dalla KVR. Igl onn 1958 ei vegniu fatg la lingia da transport provisoria giu da Sedrun, quella era buca isolada e l'aua schelava en il temps d'unviern.

Era Emil Schmid fa in interessant plaid e raquenta sur dalla historia dalla corporaziun da Selva. Sut auter menziuna el che silla Val Dumeni dat ei ina fontauna che vala la ponderaziun da tschaffar e menar el provediment d'aua.

La damonda da Tumaisch Valier, sche la fusiun hagi in'influenza sin il susteniment finanziel, rispunda il president Guido: Per quei dat ei neginas subvenziuns ed era buca schiglioc sustegn finanziel. Dil cantun savein nus buca spitgar daners. Damai che nus essan ina ferma e sanadeivla corporaziun ei quei strusch pusseivel da survegnir daners dad autras organizaziuns sco p.ex. la Berghilfe.

Ei vegn a dar midadas tier differents artechels ellas statutas en connex cun las fusiuns, principalmein:

a) Lescha per las contribuziuns d'avertura e las taxas da diever

Artechel 4: Ils numns dallas corporaziuns d'aua ein d'adattar. Quei succeda en rama cun la proxima revisiun dalla lescha.

b) Statuts Aua Cristalla

Artechel 4, alinea 3 senumna da niev:

Il raiun dalla corporaziun cumpeggia il territori en zona da baghegiar naven da Tschamut entochen Val Bugnei, sco era il vitg Surrein.

c) Taxas annualas

Las taxas annualas dalla corporaziun d'aua Surrein e Selva vegnan adattadas a quellas dall'Aua Cristalla.

Denton lai l'Aua Cristalla per il mument buca stampar novs exemplars. Eventualmein succedan ulteriuras damondas da fusiun. Ei vala pia la peina da spitgar giu.

8. Informaziuns

a) curdada da grep Val Strem

Il plan da construcziun cun fotos vegn presentaus en detagl. Tenor las datas da deflusiun drova mintga persuna intragliauter 1'000 liters aua per di. Daco che quella cefra ei aschi aulta vegn aunc intercuret.

b) ventschida project Rueras-Zarcuns

La remedura dalla lingia contonscha naven d'odem Rueras tochen ora el vitg da Zarcuns. La lingia existenta haveva biabein 70 onns. Sco gai menziunau el rapport annual eis ei vegniu sanau lingias dalla energia alpina sco era dalla vischnaunca.

c) problematica d'arsen

Sco gia informau igl onn vargau havein memia bia arsen ell'aua da Tschamut e da Selva. La Svizra ha adattau la nova norma a quellas dalla EU. Aschia ei vegniu sbassau naven da 50 micrograms per liter giu sin 10. Entochen la fin 2018 sto quella contaminaziun naturala vengnir adattada alla nova lescha da victualias. In resultat da Tschamut mesira rodund 17 micrograms per liter enstagl da 10. Selva ha in resultat da 16 e 37 micrograms per liter. In plan da pusseivladads havein schau elaborar en pliras variantas demai ch'ilg ei aunc auters interess avon maun. Sin fundament da quellas retschercas ei era ina varianta da montar en mintga reservuar filters che san schubergiar ora la contaminaziun. Per ina sligiazion definitiva drova ei aunc entgins sclariments. Ussa sundel plaunsiu alla fin da mias informaziuns e vus veseis la lavur dall'Aua Cristalla vegn buca ad ira ora ils proxims onns.

9. Varia

Sin ulteriura damonda da Tumaisch Valier, sch'ei fuss pusseivel da tschaffar aua giu da Mitlez per Selva e Tschamut, rispunda il president Guido: Deplorablamein na, la lingia da transport fuss memia liunga. Quei stat buca en relaziun cun ils cuosts. Tumaisch Valier menziunescha che las tschaffadas Tegia Gronda portan da riet aua, ei fuss interessant da saver tgei cuntegn d'arsen che quellas han.

Tumaisch Valier vinavon: En l'aua da Camischolas-sura ha ei en bia ruina ella lingia. Quei damai ch'ei setracta buca d'in conduct circular. El supplichescha da svidar pli stedi il hydrant odem, sper la casa dalla famiglia Wilhelm.

Negin'otra varia, aschia ch'il president siara la radunonza allas 21:45 uras. El engrazia ed envida en tuts commembers ad ina tscheina communabla.

Per finir giu lessel tuttina aunc far ina pintga objecziun pigl avegnir dalla corporaziun Aua Cristalla. Igl intent dalla corporaziun ei stipulaus els statuts cun sia funcziunalitad e duers

cun obligaziuns. Denton commembers ein tut ils possessurs dad objects el raiun dalla corporaziun. Enconuschentamein ei ina grupp da lavur vidlunder da reveder la constituziun communal. Era leu vegn ponderau igl avegnir dall'Aua Cristalla. Quei ei in punct che sa ussa vegnir francaus ella constituziun e prender la libertad sch'il menaschi (p. ex.) Aua Cristalla funcziunass buca.

Prender il cass ch'ei dat buca successurs ni funcziunaris per la corporaziun, ei la vischnaunca sfurzada da quasi anectar la corporaziun ed menar la fatschenta. Tgei quei effectuass san'ins mo s'imaginar.

Pia schai igl avegnir da nossa corporaziun Aua Cristalla en vos mauns aschilunsch che vus essas cunscients da surprender in ni lauter uffeci e responsablidad. **Igl ei buca memia tard.** Per finir giu lessel buca tralasar d'engraziar a mes collegas Roger e Dumeni ed a tuts funcziunaris per il premurau engaschi en favur dall'Aua Cristalla. A vus presents per igl interess ed atenziun. Cunquei giavischel in bien appetit ed ina emperneivla sera vinavon.

7188 Sedrun, 31-03-2017

il president

igl actuar

Guido Monn

Roger Berther